

第五冊

麗藻一

麗藻二

麗藻三

高麗續集卷之三

商水縣志卷十一

麗藻志一

詔

後漢

詔汝南太守

建和三

昔在前世求賢如渴封墓軾間以光賢哲故公叔見誅翁歸蒙述所以昭忠厲俗作範後昆故光祿大夫周舉性侔魚夷忠踰隨管前授牧守及還納言出入京輦有欽哉之績在禁闈有密靜之風予錄乃勳用登九列方欲式序百官亮協三事不永夙終用乖遠圖朝廷愍悼良為愴然詩不云乎肇敏戎功用錫爾祉其合將大夫以下到喪發日復會弔加賜錢十萬以旌委蛇素絲之節焉

後漢

書周舉傳

商水縣志

卷十一

麗藻志

一

對疏

附摺

後漢

河南三輔大旱

陽嘉三年

周舉

邑人

臣聞易稱天尊地卑乾坤定矣二儀交媾乃生萬物萬物之中以人為貴故聖人養之以君成之以化順四時之宜適陰陽之和使男女婚娶不過其時包之以恩導之以德教示之以災異訓之以嘉祥此先聖承乾養物之始也夫陰陽閉隔則二氣否塞二氣否塞則人物不昌人物不昌則風雨不時風雨不時則水害成災陛下處唐虞之位未行堯舜之政近廢文帝光武之法而循亡秦奢侈之欲內積怨女外有曠夫今皇嗣不興東宮未立傷和逆理斷絕人倫之所致也非但陛下行此而已豎宦之人亦復虛以形勢威侮良家取女閉之至有白首歿無配偶逆於天心昔武王入殷

出傾宮之女成湯遭災以六事尅己魯僖遇旱而自責祈雨皆以  
精誠轉禍爲福自枯旱以來彌歷年歲未聞陛下改過之效徒勞  
至尊暴露風塵誠無益也又下州郡祈神致請昔齊有大旱景公  
欲祀河伯晏子諫曰不可夫河伯以水爲城國魚鱉爲民庶水盡  
魚枯豈不欲雨自是不能致也陛下所行但務其華不循其實猶  
緣木求魚卻行求前誠宜推信革政崇道變惑出後宮不御之女  
理天下冤枉之獄除大官重膳之費夫五品不訓責在司徒有非  
其位宜急黜斥臣自藩外擢典納言學薄智淺不足以對易傳曰  
陽感天不旋日惟陛下留神裁察

後漢書  
本傳

清

請爲署陳州府通判王可思建專祠摺

咸豐九年

河南  
巡撫  
恒

商水縣志

卷十一

麗藻志

二

再上年冬間皖捻竄撲周家口地方署陳州府通判候補同知王  
可思督勇禦賊先將該匪擊退嗣因衆寡不敵被匪撲入衙內該  
員王可思不知下落經臣飭委候補知府傅壽彤前往確查辦理  
奏明在案茲據該府傅壽彤會同陳州府知府安奎稟稱該府等  
前赴周家口確查王可思屍身下落據該處鄉民僉稱賊中逃民  
俱親見該署通判帶勇接仗殺賊多名嗣勇團潰散王可思退回  
衙署被賊擁進署內將其架至署門首殺害屍身撩入火內燒燬  
等語當即飭傳該難民沈廷棟等到案查詢核與各鄉民所稱情  
形相同是該員王可思遇賊接仗力竭被害屍身被賊撩入火中  
燒燬無存已屬可信又查得王可思之子王樾禦賊被傷投河身  
死其媳馬氏被執義不受辱爲賊殺害僕人周成懷抱王可思孫  
女升官出署被賊擁擠落河溺斃車夫劉義皂役韓洪義張先軍

牢王子敬亦同時被害各死尸均已我獲查驗相符分別殮埋等稟經軍需局司道查王可思當捻匪將竄周家口之時書役人等勸其避去該員曾云爲官不離衙署當以一死報迨該員與匪接仗勇團潰散之後退回署內堅守不去被賊擁署內將其架出殺害致命遂志實與其生前之語相符其爲被賊戕害屍身等情由軍需局司道詳請具奏前來臣查該署通判王可思打仗殺賊力竭被害洵屬大節凜然深堪憫惻至其子媳人等同時殉難亦屬節義無虧相應請旨敕部將署陳州府通判候補同知王可思照陣亡例從優議卹並請於周家口地方建立專祠以慰忠魂並將該員之子王樾媳馬氏孫女升官及僕人周成車夫劉義皂役韓洪義張先軍牢王子敬一併分別議卹祀俾昭激勸理合附片

具奏

查卷

商水縣志

卷十一

麗藻志

三

約陳時弊疏

宣統元年

監察御史

李擢英

邑人

奏爲約陳時弊敬竭愚誠以保國粹而饜人心恭摺仰祈聖鑒事竊維治無論古與今總以義爲目的學不分新與舊要以理爲範圍邇來言政治道文學者迥異昔時往往棄成法如弁髦奉列強爲圭臬豈知殊方異俗取貌遺神揆之義理每多刺謬有適爲中國所詬病反爲外人所竊笑者請爲我皇上約言之一行政宜存大體也管仲霸佐猶云禮義廉恥國之四維四維不張立見消亡蓋言非此無以爲國也中國聚賭窩娼向千例禁今則各省彩票爭相效尤甚至派及地方責成州縣名爲籌款辦公實則罔民取利是民不賭而官率之子弟不賭而父兄誘脅之並以術得之孟子云上下交征利殆類是此其失大體者一也盛世無聚斂之臣今乃房捐舖捐糞捐車捐收括無遺所最不堪者妓捐一項亦按

月抽收每家若干每人若干皆有定數莠民恣肆遂儼然開張書其班曰清吟美其名曰報効國家生財有道何致使若輩失身集款况莫非赤子拯救之不暇安有因以爲利之理臣前爲巡城御史禁娼絕迹而今無忌憚矣此失大體者二也女學堂及女傳習所女子實踐所殊不可解閨闈之中詎不可讀書習藝而乃朝暮風雨獨往獨來所學語言文字既無交涉可辦又無出使可言費神勞力實覺無謂又如短衣體操沿街演隊男女無別流弊更不可勝言費神勞力此失大體者三也即此三者禮義廉恥掃地盡矣敢祈皇上飭令停辦以存國體以維士風則天下心悅誠服矣一辦事宜責實效也近來朝廷孜孜求治臣下所請率多准行於是好事者概從變計謬說改良隱便圖私顯言公益用欲省而多添局所事不殊而另設科目猶是軍旅之事而巡警探訪洋操洋

裝何與勝負之算猶是刑名之事而檢察審判各區各廳徒多等級之分推而言之錢穀則銅元銀幣一國且未暢行也工藝則製造紡紗數年尚未就緒也是故多立章程不如認真辦理鋪張表式未必切實遵行擾攘紛紜上下交困乃附和者動曰成效卓著不知成效果安在也敢祈皇上循名核實勿任以欺飾塞責則事有起色矣一用人宜黜浮華也唐宋以來皆設科目高宗純皇帝諭云取士之法不過如此其賢否在乎歷試煌煌聖訓誠用人不易之理也今則共尙專門別開捷徑學堂有定額實不足以廣陶成學生講平權更何足以興仁讓况乎但求畢業即予出身足一駐東洋便得官爲翰林主事身或通西學即專闔爲統制鎮軍人存僥倖之心士長蠹凌之習將來以此筮仕臨民竊恐有難焉者若夫京外各衙門調用人員不次超升此等情弊多由奔競已

在聖明洞鑒之中前日上諭共當悚惶無須臣贅言也敢祈皇上  
昌明正學澄敘官方則士氣伸而節義生矣一理財宜節糜費也  
伏讀正月十七日諭旨有冒濫虛糜實爲惡習著切實裁汰並官  
員薪費核實釐定等語仰見朝廷節用愛人必均必平莫名欽佩  
而臣尤有言竊見近年來舉動不免虛糜官則裁者少而加者多  
工則停者寡而興者衆任事何關房屋而務極輝煌爲官豈計俸  
薪而必求豐厚即如新添各衙門各廳各局每以洋法講聲光修  
而拆拆而修至數次不已何怪乎一處須數萬十數萬陸軍部竟  
多至三十餘萬也至於常年經費更屬不貲尙書俸纔三百金乃  
外務部郎中章京一月三百抵尙書十二月九卿俸約二百兩乃  
郵傳部丞參行走一年四千勝九卿二十年此外惟農商部民政  
部近似其餘皆相去遠矣莫非王臣莫非王事何苦樂懸殊之甚

也他如歲歲大操動逾百萬人游歷何補一毫虛糜多端未易  
悉數外省揣摩風氣張大其詞請領部款糜費亦可想見敢祈皇  
上嚴杜漏卮明定限制則帑項裕而穀祿平矣臣極慕文明未窺  
宗旨謹就平日見聞所及不避嫌怨披瀝上陳是否有當伏乞皇  
上聖鑒訓示謹奏

河南地丁雜稅徵收無定疏

李擢英

奏爲河南地丁雜稅徵收無定請旨飭令明予限制並酌量歸公  
以敷攤款而免擾民恭摺仰祈聖鑒事竊聞本年三月戶部籌款  
一摺以借用英法俄德諸國息銀爲數甚鉅令各省關及各省督  
撫於地丁茶課鹽課雜稅項下按年指撥事關邦交誠今日之要  
務也其指明地丁等項者恐此外零星無濟且擾民也臣夙懷愚  
悃愧乏良謨於他省未能周知謹就臣籍河南情形爲我皇上詳

陳之一河南地丁自賈漢復清理田賦謂州縣多征核與科則不符爲之更正今則積弊愈深矣其征銀之處每兩猶止征一兩五六錢至征錢之處則每兩征制錢二串七百文至三串餘不等合銀二兩有奇又州縣但圖早解往往以糧票付吏役而使之墊繳吏役取償於民百方需索更不能以數計是故追呼已迫敲比猶頻稱貸窮逋逃遂衆此地丁過重之情形也一河南雜稅額徵八萬餘兩係指牙帖老稅而言其置買田房活稅戶例載明每價銀一兩稅銀三分又云儘收儘解誠以此項多而無定不可以額限也乃近來州縣批解皆如額而止餘則盡歸私囊矣夫州縣大小不同而額徵均在一千內外臣見聞所及確知州縣收稅多係責成里書及稅房書吏限以成數俾按年按月呈繳若干大約大縣不下萬兩小縣亦數千兩如陳州所屬皆是蓋徵收雜稅未有

遵例三分者自六七分至十一二分任意加增又牙帖常令更換每張領費數兩故所收動以萬計而解部不過一千內外是假公以濟私者既數倍於額損民以利己者又數倍於例也數倍於額而不解則國用無以充數倍於例而不懲則民生日以因此雜稅過重之情形也臣愚以爲值此時局凡在臣民均宜稍効涓埃然欲爲州縣留有餘爲國家補不足亦惟明予限制並酌量歸公而已查地丁例應徵銀其爲數少者准以制錢作抵擬仍令徵銀每兩以一兩六錢爲度除額定耗羨外尙餘四錢五分以三錢五分存留州縣足敷辦公而以一錢附入舊額解部則三百十三萬兩之額外已多增三十一萬兩矣至於雜稅亦即照此辦理舊例三分今擬徵四分八厘以三分三厘解部並令儘收儘解由藩司發出空白契尾州縣填寫價目呈司用印後發給民間則歲增當不

止十萬兩合之地丁所增於河南每歲攤款三十九萬兩有盈無  
絀矣是誠戶部原奏所謂有益於國無損於民者也他如民間日  
用零星等物乃自食其力無論鄉鎮村落不收落地稅戶部例有  
明文且爲數甚微何能湊此巨款徒令委員差役十倍苛索於事  
恐亦無濟昔王安石以呂嘉問爲市易使行郭坊錢等法毒及米  
薪天下大擾而法卒不能行史冊所譏可以爲戒故爲今之計莫  
若於賦稅中興利除弊酌盈劑虛立以限制則民樂輸將提以歸  
公則事歸簡易在貪得無厭者或嫌其不便而好義急公者亦無  
不樂從也蓋所入既化私爲官而所出亦必有減無增如攤捐等  
款及一切陋規宜如何裁汰自必通盤籌畫不使窒礙難行是在  
善爲措置耳上年給事中張嘉祿以州縣侵漁稅契奏令各省清  
查四川督臣每年多解二十萬兩深明大義中外咸欽河南撫臣

劉樹堂公忠體國慈惠愛民果使哀益得宜必能變通盡利擬請  
旨飭令悉心經理實力奉行仍懇明降諭旨不咎既往不准浮收  
務期上下兩得其平多寡一衷諸當斯攤款有所出而他議不必  
生矣臣爲敷攤款以免擾民起見是以不避嫌怨恭摺具陳伏乞  
皇上聖鑒謹奏

再各省州縣徵收賦稅大抵以錢作銀任意折算謂之平餘去年  
給事中龐鴻書以錢漕折價奏請減收錢數戶部議准奏奉諭旨  
交令各督撫核辦除山東早經李秉衡核減江西亦經德壽稍減  
外其餘各省覆奏或曲事彌縫或藉詞搪塞均不肯認真辦理窺  
其意無非由來已久爲州縣留有餘豈知官愈有餘民愈不足近  
二十年每兩銀價均一千六七百文去年夏秋已覺日減自去冬  
至今不過一千一百上下較從前每兩少五六百文而州縣徵收

仍每兩收錢二千八九百至三四千文不等是一兩而收數兩平  
餘反多於正供矣非特民力不逮亦且人心不平擬請旨飭令各  
省督撫臣將丁漕雜稅折收制錢認真核減或即照銀價較從前  
所減之數每兩賦稅減收制錢五六百文則州縣所入并不比往  
昔加少而民間所出不至於今更多矣是否有當謹附片陳明伏  
乞聖鑒謹奏

豫省災歉疏

李擢英

奏爲豫省災歉過甚賑濟爲難籲懇天恩飭令查明災重之處將  
倉穀儘數散放並將明年上忙錢糧分別緩征以紓民困而廣皇  
仁恭摺仰祈聖鑒事竊臣等籍隸河南稔知該省連年歉收今年  
麥苗甚好乃未及登場遽遭陰雨因而顆粒霉變並麥穗多從水  
中打撈嗣後連陰數十日傾盆直注四面汪洋平地多可行舟不

商水縣志

卷十一

麗藻志

八

惟秋禾盡淹亦且房屋傾頽無所棲止雖高阜之處間有收穫亦  
不過十之一二以致民不聊生道殣相望其被災之重者與光緒  
三年該省之災相同而錢糧仍照常征收並未聞廣爲籌賑其所  
以如此者前撫臣劉樹堂性本優柔又最喜見好僚屬州縣紛紛  
調署署理者不肯報災即不能停征况征解爲藩司利藪劉樹堂  
於藩司額勒精額頗爲畏憚故其於錢漕事置之不問及至奏報  
年歲則不免自相矛盾既曰勘不成災又曰須籌賑撫其實嗷鴻  
遍野被災輕重有難以數計者彼所謂成災不成災均未能確實  
也臣等再四思維值此庫欸支絀洋債未償若爲籲懇恩施而地  
方之寬人民之衆豈易籌如許巨款惟有權宜辦理以本處之倉  
穀救本處之災黎尚可暫顧目前並明春青黃不接上忙緩征似  
亦稍紓其困是蓋因民之所利而利之即民之所欲而與之也擬

請旨飭下新任撫臣裕長與新任藩司景星遴委廉正之員確切查明將災情較重地方所有倉穀儘數散放俟新穀收成按照放過穀數核實買補作正開銷毋得絲毫浮冒並將明年上忙錢糧分別緩征俟下忙一併征解在國家惠而不費而閭閻已感且不朽矣臣等知賑濟爲難故欲權宜辦理謹恭摺具陳伏乞皇太后皇上聖鑒施行謹奏

請禁遏糴疏

李擢英

奏爲糧價日貴民食維艱籲懇天恩飭令順天府暨北洋大臣招商給照赴滬採運以裕來源而杜流弊恭摺仰祈聖鑒事竊今年京城附近歲稱中稔糧價不應翔貴祇因上海白米不准出境以故商人不能北運糧價倍增兵民均形苦累九月間有人陳奏以米貴民困請禁遏糴等語經戶部議准奏請飭下北洋大臣招集

商水縣志

卷十一

麗藻志

九

米商發給護照並咨商南洋大臣隨時查驗放行等因業經行文在案乃數天以來京城米仍缺乏價仍昂貴詢知上海地方仍係不准出境夫以南數省之米均在上海銷售向來京城用米均賴商人赴上海採買今該處因前有不肖官員私販出洋從此連出口一律禁止豈知出洋者運往外夷例所應禁出口者運往畿輔勢所難禁因噎廢食不待智者而知其不可也擬請旨飭下順天府直隸總督招集妥實商人發給護照及隨身文書並咨明南洋大臣於運津運京之驗明護照文書准其採買仍於出口之際查驗石數以杜流弊至應納關稅宜令照章交納庶民食可稍裕而稅課亦不至有虧矣是否有當謹恭摺具陳伏乞皇太后皇上聖鑒謹奏

朝廷交議事件應奏不奏疏

并附片

李擢英

奏爲朝廷交議事件應奏不奏殊屬有違定例請旨仍令年終彙奏並令軍機處隨時記載以備查催恭摺仰祈聖鑒事竊維臣下條奏原不能盡合機宜若既蒙聖明採擇俯賜咨詢正宜直言無隱以別是非而決從違虞廷所以有都俞必有吁咈也乃近來敷衍彌縫相習成風已非獻替之道甚至煌煌諭旨竟有置之不理經年并不覆奏者是豈疏忽而已哉彼其心必以爲我之事他人不得預謀將在外君命有所不受權勢重斯法令輕而隱以便其私圖顯難背乎公義故不爲置議若罔聞知耳夫公事則公言之舉凡交議之件如其可行固不必矯同立異如不可行亦不妨據實直陳况有贈必有答者理也有唱必有和者情也朋友之間且然而乃於綸綍之頒視爲蔑有不惟國家之體制無以尊且恐天下之利弊無有達也臣恭查咸豐元年上諭令各直省督撫將交

議事件年終彙奏一次夫分案奏結復令彙奏者昭慎重也聖諭洋洋理宜恪遵擬請旨申明飭令各直省督撫一體遵辦並令軍機處將廷寄隨時記載如有日久漏不覆奏者於每年正月開單催問倘敢有意延宕應交部照例議處以儆玩泄謹恭摺具陳伏乞皇上聖鑒謹奏

再臣聞庫款支絀幾難爲繼昨戶部議覆御史照麟奏請妥議歲款出入一摺內云欲求入款之增不如出款之減蓋開源不若節流理固然也臣愚以爲國家用財有可減而不求減者有不可減而仍可減者增難而減易此自然之勢也竊問借用洋債各國係以鎊折銀借之日高其鎊價折銀少使我少入還之日低其鎊價折銀多使我多出而於本息無與也夫彼之鎊價名曰先令猶中國金銀之行市人所共知我既分期還款若令駐彼使臣預將其

先令電寄於總署則辯論有據我第昭其信彼亦不敢肆其欺矣且中國銀行原爲遠近流通亦可使先期籌辦免致出入交虧然則現以鎊價不敷每年找給滙豐克薩及之五百萬固可減而不求減者也至於宮廷之需營伍之費驟言之似皆不可減然宮中有節省之方軍中多截曠之類果能逐層核實則積少成多每年所節糜費當不止數十百萬此不可減而仍可減者也抑臣更有請者天津上海廣東等處機器局每年共費四五百萬不知所製何器所配何藥而各營所需槍炮子藥仍須購自外洋既須購自外洋則各局之四五百萬可省各局既費四五百萬購自外洋之款可省二者去其一已減出款多多矣且各局三年例保所以獎有功也而官之功以匠之器爲准器不精功於何有功不有過即難辭何國家深仁厚澤原不計多寡有無惟是各省報災習爲故

常州縣預爲地步往往捏狀上聞司院委員勘驗得受規費輒與之會銜具稟又或劣紳串同官吏包攬錢糧乘機稟報隨後以災之分數爲價之低昂俾鄉民釀金爲壽名曰買災是已饑已溺皇上以災爲憂而予取予求官紳以災爲樂也迨蒙恩蠲緩頒發騰黃立法本極周密同治三年間復奉上諭申明定例以全年蠲免先欲輸官者准其流抵次年應完正賦其蠲緩定有分數先欲全輸在官者亦准下年照分數扣抵如有隱匿騰黃朦混流抵各項弊端照侵盜錢糧律治罪并著以後遇有蠲免年分將此旨一併刊刻宣示煌煌諭旨自宜永遠恪遵無如地方官吏陽奉陰違機詐百出欺蒙影射仍行闖入私囊民間雖見騰黃咸以輸官已久不敢過問故朝廷動捐百萬原非徒託空言而業戶不爽毫釐並未稍沾實惠此種積習無處不然臣維用項之繁庫款之絀實今

日之大患將以生財者興其利不若於盜財者除其弊弊在捏報則可取不取無以充府庫之財弊在浸漁則應與不與無以慰閭閻之望是則國家一大漏卮小民所感歎而無可如何者也擬請旨飭令各督撫臣轉飭所屬州縣如有災歉就近由該管知府親往勘驗驗實由知府分別輕重加結上陳然後由該管道覆勘出具印結上詳不得以委員隨意會稟塞責其騰黃到日隨令各州縣將蠲某年若干緩某年若干刊入糧票以昭信守如蠲係舊欠而實欠在官者除令經徵官賠繳辦理外仍令業戶下年扣抵後取具各村堡抵訖甘結申報本府道查核彙詳倘再有報災不實及朦混流抵等弊即欽遵同治間諭旨照侵盜錢糧治罪庶國計無虧而民生亦有賴矣臣愚昧之見未知是否謹恭摺具陳伏乞皇上聖鑒謹奏

再永定河附近地多窪下一經汜濫則數縣胥成澤國溯查前數年間決口者六次皇上軫念災黎欽派許振禕履勘興修所費不貲竊謂可相安無事矣乃今夏又復決口聞東安武清等縣莫不蕩析離居田禾漂沒并有淹斃人口之處菑害頻仍憂患未已嗟此小民其何以堪在河道同知等官雖亦革職摘頂而一至木落水盡之時即以安瀾開復且多得優保故該處實缺人員以處分爲尋常以修築爲故事有信賞而無必罰人亦何憚而不爲也或者曰河身過高上游滙歸之水又過多是以易決似也然治河如治病病在何處宜於何處治之否則從病源治起但使明其腠理施以鍼石未有不奏效者也臣閱邸抄凡奏報河決無不曰山水陡發也人力難施也抑知山水皆由於雨今年之雨比十六九兩年小甚山水從何而大從何陡發乎至於人力難施臣亦謂然惟

施之臨時則難而施之平日則易如果認真歲修工堅料實何至遽爾潰決本年山東黃河漫溢李秉衡於經手之員從重參辦亦即爲此然亦爲數十年僅見者矣臣既爲朝廷惜帑餉并爲百姓恤身家擬請旨嚴諭嗣後此河三年不決將該汎官照管獄官三年並無疎失之例獎叙若三年兩決或二年連決應革職不准留工該管上司亦從重議叙議處似此有勸有懲庶河員盡心經理不至仍前玩泄矣臣愚昧之見未知當否謹附片具陳伏乞聖鑒謹奏

請鑄銀圓通行疏 并附片

李擢英

奏爲鑄造銀圓務冀通行萬勿再蹈前轍以廣利源而裕國計恭摺仰祈聖鑒事竊維信爲政之基不信則以爲厲乎已恕爲治之本不恕則不能喻諸人如銀圓一事臣前在北城時與各城會奏

商水縣志

卷十一

麗藻志

十二

令廣東鑄造三十萬兩解京所以濟圓法之窮非不善也乃戶部收到之時行文出示皆謂出入均平將某項搭放幾成明定章程不謂搭放屬實而搭收屬虛各銀號以捐款交庫欲搭銀圓戶部輒令加色折算銀號不願喫虧均仍舊攜回市間聞風遂相戒不用銀圓蓋雖未明言而其心固以戶部之言爲不信行爲不恕也此上年銀圓之所以不行也在設立銀圓局由浙江送來機器運載艱難人所共覩若鑄出仍難通行則費力傷財實爲可惜往者不可諫來者猶可追臣既洞悉病根熟聞弊竇不能不爲皇太后皇上切實言之查戶部銀錢出入惟庫官庫吏爲政平日收發銀兩平餘規費所得無算一用銀圓則無所施其伎倆是以百計阻撓務令不能行使其堂官管庫大臣皆受其蒙蔽而不知所以然即知之而亦不能使其必然致令良法美意俱不能行此旁觀者

所爲咨嗟太息而無如何者也值此帑項支絀洋款待償上下兩受其困凡有血氣正宜稍報涓埃若猶是祇顧身家以一己之私廢天下之公情理云乎哉擬請飭下戶部嚴飭庫官痛除積弊總期言能信而行能恕則國計民生均有裨益矣臣爲時艱起見是以不避嫌怨謹恭摺俱陳伏祈皇太后皇上聖鑒謹奏

再現在天津上海等處報館林立如國聞報時務報昌言報申報滬報之類本係中國商人出貲集股所以託名外洋者恐有奪其利撓其權也其用人甚多故賢愚不等立言不擇故美惡並收近年來因事獲罪有文無行之士往往託足其中代爲秉筆於朝政則有心譏刺於外洋則極力鋪張持論多偏本不足以寓目近復造言生事作荒謬之論刊狂悖之文誠如前日上諭所謂肆其鼓簧於世道人心大有關係惟是該報館以外國爲護符開設租界

商水縣志

卷十一

麗藻志

十四

莫可誰何臣愚以爲造報者彼也閱報者我也不能使彼之不開猶可禁我之不閱且不必明申禁令也第令軍機大臣字寄京城各衙門與直省各督撫俾之轉諭屬下官商以次遞禁如有仍行閱看者量予懲創則閱者自必不閱而開者亦難常開矣臣籌畫再四惟有禁於無形尙可以彌隱憂而無口實謹披瀝下陳伏乞聖鑒謹奏

招撫拳民疏

李擢英

奏爲拳教尋仇燒殺日甚請派員迅速招撫並通知洋人以安閭閻而彌後患恭摺仰祈聖鑒事竊外洋欺侮中國據我土地奪我利權干預我政事且或籍傳教爲名縱教民以欺壓平民民間積怒既久日思報復而無術於是山東起有義和團畿輔一帶應之近日羣來城內聲言燒殺教民次及洋人並託言神助大有把握

乃燒教堂及洋人藥房竟延燒大柵欄珠室市西河沿等街及前門城樓至夜未息並與洋人對敵互有殺傷其爲無神可知况不時火燄燭天尸橫滿地商民日夜數警均覺難安豈可任令生事惟聞洋人已有懼心意欲與拳民講和以後相安無事此節尙可慶幸蓋臣所慮者洋人恣肆多年今忽受此挫辱將來必不甘心且各國以教堂索賠應接不暇若乘此機會與之訂盟盟書既定隨後洋兵雖至不能食言亦可免教堂賠款至義和團多係貧民又無統屬恐難持久擬請簡派清正臣工開誠布公分別收撫並歸董福祥管束以成勁旅則目前之干戈可息日後之禍亂亦消臣爲事已危迫起見恭摺具陳伏乞皇太后皇上聖鑒施行謹奏

處置洋人教民內外畫一疏

李擢英

奏爲處置洋人教民內外似應畫一籲懇恩准飭遵以籌全局而

商水縣志

卷十一

麗藻志

十五

杜流弊恭摺仰祈聖鑒事臣維今日釁端義和團開之而今日戰事董軍實獨任之方團民之來也莫不曰神人法力能避刀炮能燒洋房滅洋人猶反掌也而今不然矣始而託辭諉卸繼且退避不前矣徒令董福祥一軍晝夜戮力死亡相望攻禦兼施勢難中止而臣竊有請者各國駐京洋人合計不至數百名所有洋房合計不至數十處今則一千萬精兵僅敵此數百名洋人以無數子藥僅轟此數十處洋房所謂明珠彈雀所得者少而所失者多矣况相持已久並未能殺其人毀其房乎即盡殺其人盡毀其房而於洋人本國曾何損毫末乎臣伏讀本月初六日諭旨飭令各省督撫臣將各國教士驅逐保護仰見聖朝寬大格外施仁京中與外省事同一律可否亦照此行以各國之有無仇隙分別辦理前日使館門首復豎白旗正好藉此轉圜俾董福祥一軍養精蓄銳

以備大敵如治病然有外感者固宜先治內傷而用疏散者究勝強爲尅伐也再義和團之殺教民未免過甚蓋教民既多苟無生路必結死黨其已從洋人者既難望其逃散其未從洋人者且將樂爲依歸臣聞東交民巷洋人前夜刼營竟數千人其多係教民可知又聞京外州縣如武清定縣等處各聚有教民萬餘人刼殺拒捕一旦洋兵麤集皆必爲之腹心內患外憂一時何能兼顧臣又伏讀前日諭旨飭令各省曉諭教民准其自首知聖明早見及此欽佩莫名因念京師教民情事相同似亦可准其自首以免離貳而有反側如蒙俞允應明定章程嗣後團民不得擅殺亦不得焚燒如有執迷不悟始終不首之教民該團將其送官照傳習邪教律治罪房屋入官充餉以符定制至所謂假義和團可以驗其法術以決去留並可准令被害之良民取具鄰佑切結到官指控

官即立爲詳辦則真假辦而流弊除矣臣日夜焦思亟欲補救萬一是以冒昧上陳伏乞皇太后皇上聖鑒施行謹奏

以上李氏家藏稿

